

## Minuman Keras di Majlis Jamuan Negara

Rencana yang dimuat dalam majalah itu merupakan protes dari pelajar-pelajar Melayu Kaheerah dan rasa tak puas hati mereka dan berharap peristiwa yang menyolok mata mereka tidak berulang lagi.

(Oleh: Mahasiswa Muda)

Pada tanggal 5 haribulan Jun yang lalu, bahawa Kedutaan Persekutuan Tanah Melayu di Kaheerah telah mengadakan jamuan negara bersempena dengan hari jadi Yang di-Pertuan Agong Persekutuan Tanah Melayu, bahawa dalam majlis jamuan tersebut selain pegawai-pegawai diplomatik yang hadir, juga tidak kurang pelajar-pelajar dan mahasiswa-mahasiswa Melayu yang berada di Kaheerah turut hadir.

Alangkah terperanjatnya para mahasiswa Melayu apabila dilihatnya minuman di dalam majlis itu ialah minuman keras. Melihat ini para mahasiswa Melayu (yang terdiri dari mahasiswa yang beragama Islam kesemuanya) menarik nafas dan mengurut dada sambil berpandang-pandangan antara satu sama lain, seolah-olah membuat pakatan hendak angkat kaki meninggalkan majlis tersebut, sebagai tunjuk perasaan kesal yang mendongkol terhadap perbuatan semacam itu.

Setahu penulis bahawa setiap jamuan negara, adalah dilarang keras oleh pemerintah Persekutuan Tanah Melayu menghadirkan minuman-minuman keras. Tetapi pada hari itu buat pertama kali selama ada Kedutaan Persekutuan Tanah Melayu di Kaheerah jamuan negara dengan menghadirkan minuman-minuman keras. Hal ini selain menyalahi undang-undang

negara Persekutuan Tanah Melayu yang mengakui bahawa agama Islam ialah agama rasmi, juga adalah merupakan satu tindakan hina terhadap para mahasiswa-mahasiswa Islam yang menjadi tetamu pada malam itu

Alangkah kesalnya pada mahasiswa Melayu di Kaheerah, melihat gelagat para pegawai kedutaan yang tertawa terbahak-bahak, terhuyung-hayang, pening-pening lalat, dan mabuk, sehingga ada di antara isteri pegawai kedutaan yang terjerit-jerit melihat gelagat suaminya yang sudah kehilangan akal fikiran – isterinya menjerit-jerit dan terpekik-pekik meminta suaminya berhenti dari minum, tetapi sayang seribu kali sayang si suami yang sudah tidak ingatkan diri terus minum juga sekehendaknya tanpa menghiraukan jeritan si isteri, hingga akhirnya mabuknya membawa kepada muntah-muntah. Sandiwara ini berlaku di depan mata para tetamu negara dan di depan para mahasiswa Melayu yang berada di Keheerah.

Hal semacam ini bukan sahaja para mahasiswa Melayu (Islam) merasa kesal yang tidak terhingga dan merasa tidak senang hati melihatnya. Tetapi penulis yakin bahawa setiap warganegara Persekutuan Tanah Melayu pun turut merasa kesal dan tidak senang hati kerana ini bertentangan dengan cita-cita perlembagaan negara

kita yang mencatat bahawa agama Islam ialah agama rasmi bagi Persekutuan Tanah Melayu. Selain bertentangan dengan cita-cita perlembagaan negara kita, juga adalah bertentangan dengan undang-undang yang telah diputuskan oleh Dewan Rakyat, bahawa setiap jamuan rasmi negara adalah dilarang menghidangkan minuman-minuman keras.

Tetapi apa yang berlaku di Kaherah pada hari jadi Yang di-Pertuan Agong adalah bertentangan dengan undang-undang yang telah diputuskan oleh Dewan Rakyat, sehingga timbul tanda tanya:

– Apakah kuasa usaha kedutaan Persekutuan Tanah Melayu di Kaherah tidak tahu, atau belum tahu, atau tidak terfikir bahawa hal semacam itu adalah bertentangan dengan undang-undang pemerintah yang diwakilinya?

– Kalau tidak tahu, atau belum tahu, atau tidak terfikir mengapa tidak bertanya lebih dahulu kepada pegawai-pegawai yang lebih lama duduk di Kaherah dan lebih lama bekerja di pejabat kedutaan, bahawa jamuan minuman-minuman keras pernah diadakan atau belum di dalam jamuan-jamuan rasmi negara?

Atau memang hal itu sengaja dibuat kerana mahu tunjuk ke-*gentleman* mereka atau bagaimana?

Sandiwara yang menyingung perasaan ini berlaku di depan mata mahasiswa Melayu yang ke semuanya terdiri dari mahasiswa-mahasiswa yang menuntut di sekolah-sekolah tinggi Islam, secara langsung atau tidak – disadari atau tidak adalah merupakan satu tindakan

yang kurang sihat, bahkan merupakan satu penghinaan terhadap para mahasiswa Islam yang tahu bahawa minuman keras itu haram menurut hukumnya dan mereka sedaya upaya menjauhkan dari melakukannya. Dan kalau hendak ditafsirkan ke jurusan yang lain juga boleh ditafsirkan atas perbuatan itu – seolah-olah pihak kedutaan sengaja mengadakan jamuan minuman keras (yang bertentangan dengan jiwa mahasiswa Islam tersebut) adalah sebagai jalan untuk mencari perpecahan dan keretakan perhubungan baik antara kedutaan dengan pelajar-pelajar dan mahasiswa-mahasiswa Melayu di Kaherah, yang selama ini sudah sedia terjalin begitu rapat. Atau hanya mahu menguji para pelajar Melayu di Kaherah mahu minum minuman keras atau tidak.

Terus terang penulis katakan di sini, bahawa kalau pihak kedutaan mempunyai niat-niat buruk sebagai di atas, maka penulis dan para pelajar Melayu di Kaherah merasa kesal sekali terhadap sikap yang demikian rupa, dengan harapan mudah-mudahan agar segera timbul kesedaran di jiwa pegawai-pegawai dan kuasa usaha kedutaan Persekutuan Tanah Melayu di Kaherah.

Kalau memang sudah menjadi kelaziman pegawai-pegawai Kedutaan kaki minum keras, sebaik-baiknya janganlah menyolok di depan mata para mahasiswa Islam dan janganlah menyolok mata dengan minuman keras di depan mata para tetamu terhormat yang mereka itu semuanya tahu bahawa jamuan keras adalah dilarang oleh pemerintah kita. Kerana semua itu akan menunjukkan kerendahan akhlak serta

